

李文忠公奏稿

李文忠公奏稿

卷之五十一目錄

遵

旨添營請撥月餉摺

光緒十年七月初五日

請飭周盛波募勇來津片

光緒十年七月初五日

遵停永定交土章程摺

光緒十年七月初六日

永定河歲款請免扣平片

光緒十年七月初六日

勇營挑河應從緩辦片

光緒十年七月初六日

拆除清河私埕摺

光緒十年七月初六日

擬請收捐購器摺

光緒十年七月十四日

借款購器片

光緒十年七月十四日

會查防務摺

光緒十年七月十八日

口外靜謐練軍回防摺

光緒十年七月二十日

遵呈海防圖說摺

光緒十年七月二十三日

奏留馬建忠片

光緒十年七月二十三日

旅順電綫移撥經費摺

光緒十年八月初一日

淮軍支款請循舊辦理摺

光緒十年八月十一日
附清單

查覆王可陞參款摺

光緒十年九月初四日

撥濟建軍洋鎗片

光緒十年九月初四日

京引展期復額摺

光緒十年九月初四日

旅順電綫酌提奉餉片

光緒十年九月初四日

近省隄河工程摺

光緒十年九月初四日
附清單

籌辦團練摺

光緒十年九月二十一日

請豁積欠旗租摺

光緒十年九月二十一日

新募盛軍到津摺

光緒十年九月二十四日

接濟臺防要餉片

光緒十年九月二十四日

尖底舢板勢難制勝摺

光緒十年九月二十四日

派船援閩擬用洋將摺

光緒十年九月二十六日

輪船聯絡德國水師片

光緒十年九月二十六日

黃瑞蘭不堪任川片

光緒十年九月二十六日

李文忠公奏稿卷五十一

全集一之五十一

桐城吳汝綸編錄

避旨添營請撥月餉摺

光緒十年七月初五日

奏爲遵

旨籌議添募勇營額請

飭部月撥餉銀以濟要需恭摺覆陳仰祈

聖鑒事竊臣承准軍機大臣字寄六月二十九日奉

上諭吳大澂奏請飭南北洋添募勇營一摺著李鴻章曾國荃查

照吳大澂所奏悉心酌度據實具奏如須添募並著覈明餉需奏

請飭撥等因欽此臣查北洋海口延袤千餘里口岸紛歧僅就淮

練各軍現有之兵力及吳大澂所部各營分布要口大段尙不甚

空虛而防務實未敢謂周密況敵船一經北向必挾有陸隊同來

各口同時並警彼此不能相顧若無大枝勁旅往來援擊誠恐一隙之疏舉動全局

京畿門戶尤宜籌備完固何敢稍涉疏虞臣深知餉項艱難平日不敢遽請添募但以購備利器爲急蓋以軍械非倉猝可圖勇營可隨時增募也現在法人攻擊閩廠兵費已開該國正集議籌餉添兵剋期大舉先擾南省據地爲質必將北犯畿輔以遂其要挾之謀我當厚集其勢以待之亟應及時添練以壯犂援吳大澂原奏謂新招之隊與久練之師按成配搭可期得力洵屬切中機宜已督飭軍械製造各員查核現存哈乞開斯毛瑟等後門快鎗及已購未到之後膛鎗礮尙可添募十數營約計月需餉銀五萬兩目下淮餉防餉均少餘存近因沿海各省辦防解數驟短支絀萬分現軍方苦饑之更無可供添營之用惟有籲懇

聖慈俯念北洋海防尤關緊要直隸著名貧瘠無餉可籌非他省情形可比

特恩敕下戶部自本年七月分起每月山部庫就近撥銀五萬兩俾得派員支領及早募練成軍實於畿防根本重地大有裨助至吳大澂所部各營兵力亦單尙有餘存鎗械應如何酌予分撥之處俟奉

旨允准後臣再與吳大澂妥商就款籌辦隨時咨部查核所有遵旨籌議添募勇營並請撥月餉緣由謹摺具陳伏乞

皇太后

皇上聖鑒訓示謹

奏

請飭周盛波募勇來津片

光緒十年七月初五日

再津防淮軍鎗礮精利訓練嚴整首推湖南提督周盛傳爲最該軍馬步十六營從前隨剿粵捻實賴周盛傳胞兄遇缺題奏提督前涼州鎮總兵周盛波會同統帶故臨敵指揮如意屢奏奇功周盛波勇於戰陣深得士心周盛傳嚴以馭眾兼師洋法各有所長亦互相爲用也周盛波因母老乞歸退閒已久前劉銘傳過津爲言時事多艱將材難得欲調周盛波赴臺襄助該提督未之許也惟念周盛波從臣患難最久現當畿防喫緊其弟盛傳統師在津須添生力軍與之掎角援應氣勢更當百倍臣擬令周盛波由淮北選募精壯十營剋日北來配給西洋後膛鎗礮與周盛傳所部合隊操練設遇法虜深入臣當督率該提督等縱橫盪擊以期挫退凶鋒稍副

聖主倚任之重正摺內請撥部餉如蒙

俞允則添募經費有著應請

敕下兩江督臣安徽撫臣轉飭周盛波迅速募勇統領來津以資
指臂之助該員之母年踰九旬自不可無人侍奉然值此外侮緊
急遑恤其私擬俟法事定後併營節餉再懇

恩准周盛波周盛傳兄弟分一人假旋終養仍留一人在營治軍
庶爲公私兼盡是否有當附片具陳伏乞

聖鑒訓示謹
奏

遵停永定交土章程摺

光緒十年七月初六日

奏爲遵停永定河村民交土章程並查明辦理不善之員弁分別參辦恭摺仰祈

聖鑒事竊臣欽奉光緒十年四月二十二日

上諭前據太常寺卿徐樹銘奏永定沿河被水村民請暫停河工酌用民力章程一摺當諭令李鴻章妥爲籌辦茲復據該京卿奏稱村民交土流弊已極永定河一帶被水災民異常困苦豈容稍有勒派所有河工令民交土章程著卽行停止汛官余昌壽孫國培等既據稱有折價擾民情事卽著李鴻章畢道遠周家楣查明從嚴參辦等因欽此遵查前奉三月初四日寄諭當飭永定河道游智開嚴禁勒派力除弊端並將交土章程停止一節體察議稟正據稟復核辦聞續奉前因並准徐樹銘鈔

錄各村控詞折價清單山順天府尹臣陸纘轉咨又派候補道許鈴身前往周歷通工認真詳細確查凡係私自勒折浮索員弁卽會同游智開指名稟請參辦其村民交土雖係向章漸多流弊應卽遵

旨停止飭先出示曉諭旋據該道等查明擬議稟復前來臣查永定河額設防險民夫一千六百五十名係沿河宛平良鄉涿州固安霸州永清東安武清等州縣近隄十里村莊派撥協同積土防險原所以各保身家載在河工則例仍分別撥給養夫田畝優免雜差以資挹注此項民夫向於夏至上隄秋分下隄計時須九十日之久前河道李朝儀任內詳准改於春融農隙時上隄每名日挑土一方向章九十日者減爲四十五日合土四十五方挑竣卽令歸農仍酌留二成於大汛協同搶險其應挑之土預估呈報核

飭州縣派撥闖分段落不惟以弁兵役指派包折向爲實事求是起見蓋從前交土多係縣役河兵串通得錢包折並無實土到隄是以李朝儀就向章變通整頓又核減日期藉示體恤所謂逐日更替者如甲乙兩人甲輪單日挑土乙輪雙日挑土彼此更番輪替均其勞逸非謂每人止挑一日不再輪值約計每年全河不過役民夫三千人上下並無數十數萬之多自改章以後頗能實上到隄有裨河務惟向係兵役包折侵入私囊每土百方折給數十方即可了事今須到工實做不能如前之徒有具文人情好逸惡勞未能皆願各村士農工商不一未必人習畚鍤仍不得不按戶攤錢或歸木村強壯民夫挑積或呈明折價或由鄉董及河工弁兵雇夫代辦在工員弁各顧考成不能不按時催督而日久弊生經手弁兵人等即藉端刁難漁利並有戶口先密後稀地畝先

肥後瘠仍照原冊派夫者辦理既未得宜近又災歉頻仍力有不逮於是紛紛呈控臣前已飭據該河道將各村應出夫土分別減免並詳查戶口地畝酌盈劑虛務昭平允在案茲欽奉

諭旨將交土章程停止足以杜弊恤民自當永遠遵照此後挑土不能不辦所需方價已片陳請卽於扣平項下撥給免誤要工至各村所呈折交方價錢數據許鈐身查訪大致相同惟內有京錢東錢固票當十錢之別京錢每千合制錢五百文東錢每千合制錢一百六十五文固票每千合制錢二百文當十錢每千合制錢一百文如狼堡盧城二村皆係當十錢名雖六七百千實止制錢六七十千合之主方例價尙多不足此外有適符例價及浮收者該道等提集各汛被控外委百總口兵嚴加審訊大都村董弁目彼此商辦尙無勒折實跡其浮收之數謂係代辦人飯食等用

並未供認入已惟定章交土不准弁目私自包折其應挑段落亦不准弁目指派今稱或指派遠土或代雇夫頭經手方價實屬顯違功令且既經手必有刁難侵蝕情事應將指控之外委史芳卽史方之武殿平卽吳殿平王廷彥張永祥王兆瑞張天秦唐永山張殿芳八名百總汪鳳林卽汪五前劉希用馮玉山馬珍李士元崔有恆劉振彩七名目兵竄起李萃董玉王海李順何玉山王奎七名並月案被控之外委王文魁百總王致和張光勇目兵楊廷祥卞有才王照熊張福祥七名及未被指控查有劣跡之外委劉振和均卽重責斥革除糧至汛官余昌壽等前已撤任雖無勒派索擾經手方價其各村不能人人親自挑土亦勢有必然惟任聽弁目干預致被控告足見辦理不善孫國培於夫土淤地均有控案聲名平常不洽輿情應卽遵

旨嚴參請將同知銜補用知縣天津縣丞孫國培卽行革職以
示懲儆其餘各汛員情節稍輕並請將藍翎升用同知南岸頭工
下汛宛平縣縣丞余昌壽藍翎升用同知南岸三工涿州州判周
替第均革去同知升階並藍翎又五品銜升用同知南岸四工固
安縣縣丞張映辰革去五品銜並同知升階又北岸四工下汛固
安縣縣丞李丕裕請摘去頂戴與余昌壽周替第張映辰均開缺
留工月補又四品銜升用知州候補通判謝政賢請革去四品銜
並知州升階其失察弁目折價未被指控之汛官升用知縣南二
工良鄉縣縣丞陳麗生理問銜北岸頭工下汛宛平縣縣丞方志
勤升用知縣北岸二工上汛良鄉縣縣丞鄭官賢升用同知北岸
五工永清縣縣丞吳宗騏請革去同知知縣升階理問升銜暫行
留任以觀後效北岸頭工上汛武清縣縣丞張善莊所轄之盧城

等村雖折價不敷挑土但任升自擅折請摘去頂戴又五品銜南岸六工霸州州判錢承禧失察已革銷兵預支夫價除撤任外請革去五品銜此外員弁口兵或並無不合或已有事故應免置議至原撥養夫地畝飭卽查勘除有水冲沙壓不堪耕種者除糧外其餘或撥回另佃或循舊承租悉聽民便嗣後續有冲壓及淤復之地隨時勘明分別除糧升科凡承租養夫地畝村民遇大汛搶險之時由各本村公正紳董督率幫搶各衛身家每種夫地三十畝出夫一名免其完納地租險平卽行下隄工員無庸干預紳董亦不得藉端派斂違則重懲未經出夫者仍照章完租如有不種天地而自願出夫幫搶者免其雜差其災歉苦累村莊仍照地方章程減免差徭卽飭各該州縣一體明白曉諭毋得稍任差役擾索未盡事宜隨時稟詳核辦此外各河向歸民辦者仍照章辦理

不在滋弊所有遵停永定河村民交土章程並查明辦理不善之員弁分別參辦緣由理合會同兼管順天府府尹臣畢道遠順天府府尹臣周家相合詞恭摺覆陳伏乞

皇太后

皇上聖鑒訓示謹

奏

永定河歲款請免扣平片

光緒十年七月初六日

再欽奉四月二十二日

上諭永定河令民父土章程著卽行停止徐樹銘所稱購土經費仍取之河工自有之款著李鴻章妥籌辦理等因欽此伏查永定河切近

京畿修防關係重要該河大溜渾濁隄土又皆純沙往往旋挑旋淤旋築旋塌甚費工力且全河長至二百餘里兩岸全隄長至四百餘里統計工程繁巨大汛搶險走埽潰隄尤必料物人夫應手額領歲款實有不敷河兵力作之處甚多而口糧無幾是以向須民夫挑土協助其原有地租釐課每年徵銀不過一千餘兩皆有待用專款加撥之釐金二三千兩係備搶險麻袋土車及津貼河兵米麪要用均難撥作此項購土經費惟額領歲款內向由藩司

例扣六分平一項每年合銀五千六百餘兩本係河工自有之款
若照原奏免扣仍歸河工應用洵堪移緩就急查沿河原設各汛
民夫一千六百五十名計每歲應挑土七萬四千餘方茲自今年
起概行停止民夫統歸官辦按每方民價銀七分計之約需銀五
千餘兩數正相符據該河道游智開會同許鈐身議稟前來相應
仰懇

天恩特准將該河歲款內六分平銀五千六百餘兩自本年爲始
卽行免扣專作雇夫挑土經費庶要工不致貽誤河務不致廢弛
其沿河各村夫土卽從此豁免永無後累旣足以廣

皇仁而國計民生亦得兼顧如蒙

俞允此項平銀土價仍責成該河道嚴督廳汛核實辦理若遇繞
越遠上方價增長應令就款通融勻用不得請添所有永定河歲

款請免扣平專作購土經費緣由理合附片據實陳伏乞
聖鑒訓示施行謹

奏

勇營挑河應從緩辦片

光緒十年七月初六日

再欽奉光緒十年五月二十一日

寄諭徐樹銘奏請飭營勇挑挖永定河中洪一摺著查明應行挑
濬之處酌派營勇並督率該管河道嚴飭河兵合力疏濬等因欽
此遵查永定河挾沙壅泥水極渾濁每屆汛後淤墊雖歲歲挑挖
而人力有限勢難盡除在雍正乾隆年間已逐漸高仰嘉慶道光
以後河底墊高不止一二丈昔人譬之於牆上築夾牆行水故有
改河之議蓋因全河道段過長積淤過厚勢難將中洪一律疏通
其兩岸亦無出沙堆積之處也惟改河築隄勢難計室礙尤多
不得不仍就原河量力補救同治十一年臣曾易行籌款挑挖中
洪一次上自盧溝橋下至鳳河計挑二百餘里嗣後則按年督飭
該河道就歲款籌挑但沙泥太多水過仍復淤墊光緒七八年與

左宗棠會派湘淮各營自南八上汛三號起挑新河一道以暢下游去路數年來或北或南改道已非一次淤沙又多停積原挑南五工以下引河亦漸墊平飭據該河道游智開查勘自上流中洪至下口僅擬酌量挑寬十餘丈至二十丈深二三尺至一丈約需挑土五百數十萬方之多卽就南五工以下估計亦需挑土二百數十萬方每人每日挑土一方計上下游須有六萬人三箇月功夫方可蒞役工程過巨人力財力皆有不逮且亦只能保數年安瀾直境淮練各軍操防之暇素習畚鍤頻年挑築工程不少靜海天津之南運減河其尤著者惟人數無多只可逐漸經營勢難遽興大役今春已派辦近津河隄疊道各工適值海防喫緊疊奉諭嚴備戰守臣正督飭曉夜操巡磨厲以須實未能再顧河工前已飭游智開始就成款嚴督河兵酌雇民夫擇要疏濬所有酌

派營勇挑河一節應從緩察看情形妥酌核辦以免顧此失彼理
合附片具陳伏乞

聖鑒謹

奏

拆除清河私埝摺

光緒十年七月初六日

奏爲查勘拆除清河北岸等處私埝疏通水道恭摺覆陳仰祈

聖鑒事竊臣欽奉光緒十年四月初二日

上諭都察院奏順天生員劉青雲等呈訴清河北岸各築私埝阻
遏水道以致無從宣洩等語文安等處向來水災極重所呈關係
民生利害應如何疏濬之處著直隸總督會同順天府查勘明確
奏明辦理等因欽此當經咨會順天府尹臣查照旋准咨覆由直
主稿核辦暨將劉青雲等在府尹衙門所遞呈詞錄送前來臣查
安州等處之西淀向稱巨浸應由趙北口穿柴伙淀卽白草窪經
清河歸東淀達津入海清河既爲西淀宣洩之路又受白溝諸水
源大流多並藉北而中亭河分洩自來清河無北隄中亭無南隄
使盛漲互相吐納各免壅滯立法甚善其清河中亭之閒窪地甚

厯俟汎漲消落種麥次年汛前收成亦不失一水一麥之利此乾隆以前幾經斟酌籌定之舊制也乃附近居民貪種淤地與水相爭於柴伙淀清河北岸一帶逐漸攔築私埝亦間有朦混稟准者夫柴伙淀清河口築埝山西淀水路阻塞安州首當其災並波及近淀之高陽任邱雄縣上游之科城清苑各境河北岸中亭河南岸築埝則上游雄縣新城固安涿州白溝諸水亦被阻塞且西淀清河水路既皆逼緊勢必闕破千里隄清河南隄由任邱雄縣滲入下游保定霸州大城文安而以文大窪爲壑誠如聖諭受災極重是以文大霸保被害矜民劉青雲等疊次呈懇拆除臣前據清河道史克寬稟請已飭嚴禁再築並令察酌平毀欽奉前因復派分發補川道金福曾署天津道劉樹堂與史克寬妥細勘辦旋據稟稱各處所築私埝除無甚阻水者不計外其阻水

者實礙上下游大局若不分別拆通轉瞬大汎又將橫流爲害上年大水各埵已多衝缺趁此辦理事半功倍遂督飭委員拆去清河口橫埵三道張青口橫埵一道魚津窩上下橫埵兩道滄浪淀賈莊子趙家房王疙疸月亮地橫埵七道又挖通柴伙淀卽白草窪上下埵口及旁面埵口十三道魚津窩直埵口門十丈石溝河斜埵口門十丈並將張青口減河五百四十餘丈柴伙淀下口引溝一百十餘丈一併挑通使柴伙淀漲水亦得暢洩等情臣查私埵阻水曲防害鄰本干明禁況西淀清河關係十數州縣水道全局該淀窪向係任水蕩漾之區乃私埵縱橫水無去路無怪年年泛溢各州縣迭受沈災在小民貪種者所得無多而

國家蠲賑之費與災區所失之貨不知凡幾其利害輕重較然斷難姑息一隅致多窒礙亟應遵

旨設法疏通今經該道等勘明將阻水私埝分別拆除本屆汛漲
洩水已較暢速俾得遞輸歸海具有明驗嗣後該淀窪地面應仍
復舊制一水一麥之利不准再築私埝每年三五月由天津清河
兩道派員勘查認真禁築其水道淀地從前報墾有糧者卽飭查
明聲請豁免以示體恤除將劉青雲等所呈屢濬清河各節另行
核辦外所有清河北岸及柴伙淀一帶有礙水道私埝分別拆通
以復舊制緣由理合會同兼管順天府府尹臣畢道遠順天府府
尹臣周家楣合詞擬陳伏乞

皇太后

皇上聖鑒謹

奏

借款購器片

光緒十年七月十四日

再臣因海疆需用利器擬暫行酌量收捐以資購辦片摺詳陳在案惟現在戰守機宜喫緊若待捐集鉅款而後購辦實屬緩不濟急且外洋軍火一經定購即須陸續付價直省庫儲極絀萬難勻籌查上年冬間臣代閩粵各省購辦西洋火器曾

奏明在於江海關庫存出使經費項下撥銀四十餘萬兩分起借付有案現在出使經費該關尚有積存此次籌購大批軍火事關緊急所需價銀擬請照案仍由出使經費項下先行借撥分期付價一俟捐有成數陸續歸還俾資周轉而免遲誤俟奉到

批旨臣即先與素識洋商酌量密訂購辦是否有當理合附片陳請伏乞

聖鑒訓示施行謹

奏

奏稿五十一

共

會查防務摺

光緒十年七月十八日

奏爲遵

旨會商覆陳仰祈

聖鑒事竊照六月二十七日欽奉

慈禧端佑康頤昭豫莊誠皇太后懿旨醇親王面奏左宗棠所部
易玉林喻先知兩軍迄無來京確信畿東防務緊要擬由神機營
遴派馬步練軍三千人並由巡捕五營練軍內選派二千人一切
軍火豫備妥協擬請以都統善慶爲總統前鋒統領托倫布爲幫
辦總統分防畿東以備不虞左宗棠所部既未來京擬由直隸防
軍內酌抽協同京兵分段固守善慶與淮軍相處最久如與合隊
必能相助爲理擬令其先行赴津與李鴻章面商一切卽由該前
大學士與該都統聯銜奏在再由神機營奏明將派出各隊分起

赴防等語均著照所議辦理欽此臣善慶跪聆

聖訓後遵即馳抵天津謹將

皇太后諄諄告誡語意傳知臣李鴻章感激

天恩敢不率同各營將士努力奮勉共圖捍衛

畿疆以仰答

高厚生成於萬一臣等連日反覆籌商直隸瀕海地方太廣淮練各軍分段固守無可懸勁即無可抽撥京東一帶以山海關最爲扼要廣東水師提督曹克忠正定鎮總兵葉志超馬步十營深溝高壘駐守關隘次則昌黎樂亭沿海各處有吳大澂馬步礮隊十營聯絡分守該道政使昨又添募步隊三營兵力稍厚惟自山海關西至撫甯永平係入關大道尙形空虛設海口防軍被敵圍困必須勁旅就近援應攔截昨奉十四日電

旨飭臣鴻章督辦布置期於戰守足恃因飭現駐青縣之記名提督劉盛休統領銘軍鎗隊十營馬隊一營剋日分起拔赴永平撫衛擇要布紮庶有警時相機援剿聲勢愈壯凡此皆畿東防務前敵布置之情形也神機營暨巡捕營皆

羽林禁旅操練既久訓練嚴似宜籌給修築營濠兵棚之費分

紮近

京通州一帶爲後路聲援以備不虞臣鴻章與吳大澂所部在前敵奮力戡本單未便調回後路轉致顧此失彼惟查有現紮北塘後面之軍糧城記名總兵徐邦道馬隊二營前剿捻時曾隨同臣善慶左右角逐向稱驍勇臣鴻章擬就戶部准撥月餉令其添募步隊二營名曰拱衛營配給後膛鎗礮認真訓練仍紮軍糧城咽喉要地軍糧城橫至通州迤東百數十里聲氣尙易聯接將來有

事時善慶督隊前敵徐邦道即歸其節制調遣當能相助爲理即
淮軍各將領相處最久氣誼素孚亦無處不可合隊防剿再接再
國奎電報八月間定遣恪靖七營北來又善慶前調各省馬步
隊必仍有應

召入衛

畿輔者屆時再由臣會商協同京兵分段固守以期厚集而免疏
虞所有臣等會籌各緣由謹繕摺合詞馳陳伏乞

皇太后

皇上聖鑒訓示再臣善慶俟料理就緒即赴通州東路察勘紮營
處所再行同京覆

命合併聲明謹

奏

口外靜謐練軍回防摺

光緒十年七月二十日

奏爲口外匪徒剿捕殆盡蒙民靜謐如常已將練軍撤回仍暫留馬隊巡緝彈壓恭摺仰祈

聖鑒事竊前因多倫附近蒙古克什克騰旗魚泡子地面游民聚眾滋事經臣調派宣化古北口練軍馬步隊馳往剿辦飭宣化鎮總兵王可陞出邊督辦業將擊斃追捕情形先後奏報並於六月二十三日摺內聲明賊數無多仍令王可陞將王端仁一股設法剿滅其岡場以內卽傷古北口參將許春浦暨熱河練軍分路搜查在案續據王可陞稟稱王端仁一股該鎮派隊裹糧雇覓蒙人引路跟蹤遠迫由什巴爾臺竹里克山中薩克米神廟毫爾頭廟節節前進直至鄂爾騰河遇賊擊斃十餘名其餘五十餘名由色納格河哈喇烏蘇營子格廟嘛拉蓋達壩分兩起逃竄該匪沿路

搶糧換馬其行迅疾我軍連旬窮追僅以熱水和莜麵充飢且馬力疲乏婉商各王旗隨地備換馬匹並請飭派蒙兵就地協擊嗣又追捕多日該匪竄入阿魯科爾沁旗被蒙兵截擊傷斃過半我軍亦在各處搜獲賊目以山虎許姓等多名訊供正法其逸去者不過數名據克什克騰旗梅倫官分投四探距經棚三四百里均無賊蹤魚泡子周圍二百餘里亦無窠穴統計前後擊斃賊匪約八百名解散者從不少其中賊首馬洛入黃洛四曾經土城子汛千總洪富經棚守備失振清與馬隊弁兵擊獲立時正法又前在畢流溝接仗生擒悍賊黃姓張姓三名肆口憤罵就死即有張朋在內據獲賊許姓供稱周沅得被我軍追至永隆泉斬斃惟王端仁膀受鎗傷而逸不知下落又據熱河道富華稟稱開場赤峰等處賊匪前已擊散僅有零匪改名易姓逃匿鄉間應由地方官搜

捕又據參將許春浦稟稱該將督隊追圍興宣化熱河練軍多倫
練勇跋涉溝嶺分路搜查皆無賊蹤又據多倫廳同知陳金式稟
稱王端仁等被宣軍追剿並經阿魯科爾沁旗蒙兵擊斃僅逸去
四五十名廳屬及各旗草地並無賊匪等情先後稟報前來臣查此
股匪徒經各處官軍疊次剿捕殆盡據報所餘無幾棄械逃散其
賊首匪目亦先後擒斬多名固已大受懲創現惟王端仁於受傷
後逃逸不知下落既有熱河多倫等處官兵常川分投緝捕無庸
再留宣化古北大隊且刻值海防緊急內地空虛亦不便使練軍
久頓塞外昨已飭許春浦率隊回駐古北口另調該口練軍前營
步隊馳赴蘆臺海防歸提臣李長樂調遣並飭王可陞督隊回宣
仍於宣化練軍內暫留馬隊三哨分紮多倫附近二道泉閃電河
二號汛一帶多倫練軍內撥馬隊三哨分紮劉家營子西溝薩令

河長汗溝一帶均會同地方官認真巡緝彈壓多倫協副將譚興
魁暫駐經棚與熱河官兵聯絡聲勢確探勤搜務期設法弋獲王
端仁以靖餘孽傷亡官兵祖首人等另行查明請卹多倫轄境被
擾之處已飭該廳親往查察妥爲撫綏所獲餘匪訊明甘心從逆
與官軍接仗者照例懲辦其良民被擄乘間逃回者分別取保遞
籍管束開場查緝事宜前已奏明責成開場官員認真辦理經棚
一帶客民良莠不齊亦卽查照臣六月二十三日原奏並欽奉七

月十七日

諭旨嚴飭該管文武認真清查口口遴選社長查拏匪類安撫良
民庶幾反側皆消而地方益臻靜謐矣所有口外匪徒剿捕殆盡
撤回練軍仍暫留馬隊巡緝彈壓緣由理合恭摺由驛具陳伏乞
皇太后

皇上聖訓示誡
奏

遼東海防圖說摺

光緒十年七月二十三日

奏爲遵

旨恭呈北洋沿海設防各要隘礮臺營壘圖說仰祈

聖鑒事竊准軍機大臣密寄閏五月初九日奉

上諭旅順口礮臺是否堅實天津至山海關一帶礮臺其若干處
卽著查明詳細情形將直隸口岸及旅順煙臺各礮臺繪圖貼說
呈進等因欽此又接總理衙門七月初四日來電本日奉

旨天津海防布置前已據李鴻章詳奏尙未將圖說進呈其餘沿
海各口星羅碁布口岸甚多各防營四處分紮各專責成著各該
督撫將各口地形繪圖貼說卽將某營現紮某口兵勇若干何人
管帶有無礮臺分別詳細注寫等因欽此仰見

聖謨廣迪經武整軍考核嚴明無任悚威查直隸各口礮臺若干

及沿海防務情形經臣於本年閏五月十三日詳奏並聲明各臺
壘隨時增修舊存草圖未盡諦當遴委正任津海關道周馥前赴
各海口會同該將領詳細查勘繪圖貼說彙呈以便恭進在案茲
據該道周馥勘畫齊全彙呈前來臣查北洋沿海地段縣長要隘
極多現在擇要屯兵處所南起煙臺北迄山海關營口旅順口等
處延袤幾三千里斷難處處周密而中間以旅順口爲首衝大沽
北塘及山海關內外爲要衝尤關繫

畿疆要害臣歷年次第經營規模粗具雖未能創設大枝水師縱
橫海上以扼渤海門戶而督飭陸軍堅築臺壘精習後膛鎗礮以
爲憑岸固守之計竭我兵力餉力以萃聚於此三四處設敵國大
隊水陸來犯不敢謂有把握當可力與搏持請將布置形勢爲
皇太后

皇上詳晰陳之旅順口地處海外爲駐泊水師口岸瀕臨大洋岡嶺阻複形勢極險礮臺高踞山頂築造精堅上有巨礮可擊來船其近山要路數處多設行營礮臺並於口內密布水雷沿岸多設地雷派四川提督宋慶統毅軍等十一營駐守已革江西南贛鎮總兵王永勝帶護軍營八哨協守臺壘天津鎮總兵丁汝昌帶蚊船兩號快船兩號並道員劉含芳帶魚雷艇弁兵與宋慶等表裏依護如敵船游弋外海可相機伺便狙擊冀以牽制其北攻津沽且藉衛本省門戶大沽北塘口外各有攔港沙一道潮落不通輪舟潮長亦不能進鐵艦兩岸礮臺屹立下伏水雷甚多大沽口內兼設攔河木筏大沽守將爲副將羅榮光後路以湖南提督周盛傳盛字等營爲接應北塘守將爲署廣西提督唐仁廉後路以直隸提督李長樂武毅等營爲接應山海關內外數十里老水貼岸

敵船可近岸一二里外停泊最爲險要現築三合土大礮臺一座土礮臺二座其餘營牆瀕海一而均照礮臺式堆築力求堅厚守將爲廣東水師提督曹克忠正定鎮總兵葉志超其後路撫甯永平一帶以記名提督劉盛休銘字馬步十一營爲接應山海關迤西昌黎樂亭一帶小港甚多誠恐敵船擾我不備經會辦北洋事宜通政使吳大澂派所部鞏字綏字等馬步十一營並新募三營駐守臨時亦可相機南北援應此旅順大沽北塘及山海關等處布置情形也至於奉天之營口礮臺工程爲前關道續昌督修力求堅緻今始粗完口外有攔港沙一道內爲遼河水淺不通輪舟經奉天將軍及臣先後派委記名提督左寶貴等帶勇七營防守該處海灘平衍無形勢可據無城池可守只一通商碼頭且食水須取之四十里以外惟陸路距瀋陽僅三百六十里應由該將軍

派隊接應後路以固邊圉山東之煙臺濱臨大海有山無險有市無城雖築有通伸岡礮臺一座形勢太孤現亦未安巨礮撫臣陳士杰派兗州鎮總兵全祖凱帶八營駐守煙臺後路夾河地方伺敵上岸可以出隊兜擊登州府城露立海崖之上撫臣陳士杰委前濟東道李宗岱帶八營與登州鎮蔡國祥分守府城內外以上二口距直稍遠而距京更遠該省兵餉兩絀布置不過如此亦限於力量之無如何茲遵

旨繪具北洋總圖一紙凡各處海口礮臺若干統兵何人兵數幾何一一詳載又具大沽北塘山海關營口旅順口煙臺登州七處分圖共七紙其山水曲折臺壘駐紮處所並按地位摹繪又旅順口黃金山礮臺係延德弁漢納根仿德國新式築做臺形區而小兵房子藥房均藏臺牆之內敵礮難以攻入非紙畫所能畢肖因

多和五十一
製木樣一具又山海關甯海城礮臺緊臨深水易受敵礮故築做
力求堅厚臺牆外包沙土內藏子藥頗爲勞費工作半藉兵力三
年始成亦製木樣一具一併恭呈
御覽謹繕摺詳細覆陳伏乞

皇太后

皇上聖鑒訓示謹

奏

奏留馬建忠片

光緒十年七月二十三日

再欽奉七月初六日

寄諭道員馬建忠熟悉洋務現在總理各國事務衙門需人著李鴻章密飭即日來京豫備引見等因欽此當經密飭遵照惟查該道馬建忠前因法人啟衅飭往上海確探軍情隨時密報似可相機因應並以宣戰之後由滬解赴閩粵及北路鎗礮要件各船不肯裝載又飭會同委員密雇商輪設法轉運以資接濟該道熟悉洋情公法辦理尙能妥慎現值戰守機宜喫緊偵探轉運均關重要一時難更生手致有貽誤擬請暫緩北上俟軍務稍鬆再行給咨來京理合附片具陳伏乞

聖鑒謹

奏

旅順電綫移撥經費摺

光緒十年八月初一日

奏爲遵

旨趕辦山海關營口至旅順口沿海陸路電綫以通軍報請將迫
提浙興練錢項下平糶餘款移緩就急撥作經費免誤要工恭摺
仰祈

聖鑒事竊山海關營口至旅順口皆北洋沿海緊要之區分駐各
軍築臺扼守文武將領往來文報動輒逾月經旬若海道梗阻則
消息難通非趕設電綫無以速調度而赴事機前以此路皆係軍
報商股不能招徠北洋又無巨款驟難妥設曾於籌辦津沽北塘
至山海關電綫摺內陳明近因法人兵艦聲稱不日北來沿海防
務喫緊疊准總理衙門來電營口旅順口等處應設旱綫以通消
息並欽奉

諭旨速辦等因臣已飭署津海關道盛宣懷等趕緊派員率同洋匠查勘設綫路徑一面速購電綫器具木料運解應用昨復以山海關至營口爲一段營口至旅順口爲一段派員馳往分投興工以期剋日蒞事查自山海關至旅順口約計陸程一千五百餘里且較內地弓步里數爲長據約估需銀十萬兩左右臣臆商奉天將軍臣慶裕府尹臣裕長覆稱奉省無款可籌直隸餉需極絀艱窘異常更難設措惟查有追提浙江典商原領練餉制錢成本二十萬五千串除歸還上年借墊順屬賑需不敷銀二萬三千一百餘兩計尙可合銀十萬兩有奇前經奏准提銀十萬兩購糧運京平糶已動用銀二萬六百九十餘兩現在平糶停止計尙餘銀七萬九千三百餘兩刻值戰事已成山海關營口至旅順電綫尤關緊要必須遵

旨趕辦仰懇

天恩俯准將前項銀七萬九千三百餘兩儘數撥作安設電綫之用以應急需而免貽誤其不敷之項臣再督飭支應局司道竭力設法籌湊並令各員核實撙節辦理事竣分晰開報所有電綫工程緊急請將平糶餘款撥濟緣由理合恭摺由驛具

奏伏乞

皇太后

皇上聖鑒訓示施行謹

奏

淮軍支款請循舊辦理摺

光緒十年八月十一日

奏爲淮軍各營支款與楚軍刊章聞有未符均係勢所必需歷經奉部准銷應請循舊辦理恭摺仰祈

聖鑒事竊准戶部咨開淮軍第十一案報銷冊造專統官提督周盛傳吳長慶劉盛休每月薪費加夫按照所帶人數計算皆與定章不符惟劉盛休業據奏明專統並無白帶坐營所支薪費各項係參酌定章加給周盛傳吳長慶亦係專統事同一體俱在開支又盛字等軍分統各官並差弁月支薪費夫價等銀亦係續添隨冊請支之款查與歷次准銷銀數相符應准支給仍令將各營開支款項凡有定章外加增者認真裁併報部並將駝騾確查現存若干按數支給餵養等因臣查淮軍案內統領月支薪費加夫銀兩原比照刊章所統人數核給凡營數較多之軍月於管帶內揀

員分統以資鈴束亦按分統人數酌給薪費嗣因先後裁營人數較減開與定章未符惟籌辦海防事關重要既與內地防軍練勇有別應飭改練西洋鎗礮修築礮臺營壘兼辦地方水利河工屯墾各事需用浩繁核計原有員弁及原給薪費僅可敷用是以未能減裁仍再三審度限以定數應奉部議核明准銷有案誠以軍中要需必不可少若於向所應有者驟爲裁減所省無幾而刻覈太甚或以不肖之心應之更恐別滋弊端且非激勸忠義之道況現值法人開盤海防喫緊正督嚴備戰守尤宜固結軍心使其踴躍用命前支各款雖與楚軍刊章稍有未符之處實皆隨事權宜覈定勢所必需並無分外糜費礙難裁併應請循照歷年舊章辦理以免紛更而示體恤至各營駝騾隻數前已委員確查除倒斃外卽照實存之數爲額核給餵養各營續有買補不在添給餵養

較之從前原發銀數倍加節省而於行軍轉運裨益良多據報銷
局司道具詳前來應專摺據實陳明繕單敬呈
御覽伏乞

皇太后

皇上聖鑒敕部查照謹

奏

謹將淮軍案內開有未符刊章酌定支給歷經奉部准銷各款繕具清單恭呈

御覽

計開

總統分統會統帶各官薪費加夫項下

一盛字等軍專統官一員月支薪費銀三百兩加夫三十名

一銘字等軍專統官一員月支薪費銀三百兩加夫三十名

一慶字等軍專統官一員月支薪費銀二百兩加夫二十名

一親兵馬隊三營一哨管帶兼統帶官一員月加薪費銀五十兩

一盛字步隊左軍一營管帶兼分統官一員月加薪費銀一百兩

一盛字步隊右軍一營管帶兼分統官一員月加薪費銀一百兩

一盛字馬隊五營二哨四棚管帶兼分統官一員月加薪費銀一

百兩

一銘字步隊左軍四營管帶兼會統官二員其月加薪費銀一百

兩加夫十名

一銘字步隊右軍四營管帶兼分統官一員月加薪費銀一百兩

加夫十名

一銘字楚軍馬隊五營一哨管帶兼會統官二員其月加薪費銀

一百兩

一慶字親兵步隊六營管帶兼分統官二員每員月加薪費銀一

百兩

一護衛親軍營內開花礮隊幫帶官一員月支薪費銀五十四兩

查前項總統分統會統各員薪費均必不可少之需其加夫

每名日支銀一錢歷經由部註銷有案

文武官弁隨營辦事支應轉運餉械差遣各員薪糧項下

一 郎中員外主事翰林院六七品官月支薪糧銀四十兩至六十兩

一 道府月支薪糧銀三十兩至五十兩

一 同通州縣月支薪糧銀二十兩至四十兩

一 佐雜各官月支薪糧銀十二兩至二十四兩

一 提鎮月支薪糧銀十二兩至四十二兩加夫三名至六名

一 副參游月支薪糧銀十二兩至三十六兩加夫三名至六名

一 都守千把月支薪糧銀十兩至三十六兩加夫二三名

查前項文武官員各營差弁向由統兵大臣察酌事務繁簡分別委用其薪糧多寡及加夫亦按差使煩簡酌定若論官階比照例支銀數通計有減無浮節省較多歷經在銷有案

馬隊營哨長夫項下

一護衛親軍馬隊二哨長夫二十名

一親兵馬隊三營每營五十名又一哨七名

一盛字馬隊五營每營五十名又二哨二十名

一銘字馬隊三營每營五十名又一哨十名

一楚軍馬隊二營每營五十名

查前項馬隊營哨長夫係自剿捻起援照步隊酌給以爲隨營搬運之用每名日支銀一錢懸經准銷有案

步隊營哨駝騾項下

一親軍礮隊營駝騾二十頭

一盛字步隊營哨駝六隻駝騾二百九十四頭

一銘字步隊營哨駝六十三隻駝騾二十九頭

一慶字親兵步隊各營馱騾二百八十頭

查西征案內迭購馱騾駝並奏調蒙古捐駝分發各營運載應用原定每營月給餵養銀一百兩凡一營六哨者月給銀一百五十兩嗣因原撥駝騾陸續倒斃卽經委員查明以實存確數爲額按照每隻頭均日支餵養銀一錢並不另給夫工較之原發銀數倍加節省各營每以糧餉軍械全賴駝騾馬匹馱運因有倒斃陸續由營購補致多於原驗存數均批飭仍照前次查驗之數爲額以示限制不准請增餵養歷經准銷有案

以上各項皆爲軍營要需勢難裁併應請循舊辦理

查覆王可陞參次摺

光緒十年九月初四日

奏爲查明總兵並無剋扣馬乾各款恭摺仰祈

聖鑒事竊臣欽奉光緒十年六月十二日

寄諭有人奏參宣化鎮總兵王可陞各款前據李鴻章奏五月二十二等日王可陞稟報克什克騰旗魚泡子地面匪徒滋事派宣化練軍馬隊前往剿辦續經奏報該練軍於閏五月初五等日出隊迎剿斃匪多名茲據所參此次股匪起事閏五月十六日經該廳達報該總兵置若罔聞十九日始派隊出緝核其日期係屬錯誤至所參該總兵剋扣馬乾以致馬匹疲瘦閏五月十八日猶演戲賀壽各節是否屬實著李鴻章確查具奏等因欽此當飭口北道吉順就近密查據實具覆旋據該道稟報前來臣查口外克什克騰旗魚泡子係蒙古游牧地面非宣化鎮管轄此次匪徒起事

因蒙古不令捕魚殺斃多人頓生變亂該總兵王可陞聞報後不
分畛域立派練軍馬隊馳往勦辦卽於閏五月初五初十等日在
畢流溝三義泉等處斃匪五六百人我兵亦受傷十餘人並無隊
官被賊轟傷該總兵正值染患時瘟病體少愈卽力疾出邊督辦
原參閏五月十六日該總兵據報置若罔聞十九日始派隊出緝
實屬錯誤業蒙

聖明洞鑒應毋庸議至所參每屆五六月各兵應領馬乾全數扣
下令該兵等在外牧養所部之勇有散入賊隊者遇事馬匹疲瘦
均不得力一節查該鎮綠營餉乾向山口北道發交各營散放不
歸鎮署經理其練軍餉乾係該總兵派弁赴省領回轉發營哨官
散放前因宣郡城垣殘破過甚派練軍馬隊興修將馬匹雇人在
外牧養除於乾銀內核給受雇人工費其餘悉數撥交各兵自用

並無絲毫剋扣該練軍隊伍整齊馬匹並無疲瘦向稱得力爲官民所共知更無在營之兵散入賊隊情事又原參演戲賀壽一節係因雨澤應時秋收可卜羣議演戲酬神以申祈報旣非該總兵之意尤與賀壽行樂不同復查王可陞前隸將軍多隆阿麾下卓著戰功在宣化十餘年紀律嚴明軍民和洽餉乾一切歷來涓滴歸兵毫無剋扣並將駐防庫倫練軍所需米麵乘減價時核實購運設法節省銀兩按名分給以恤兵艱其於捕務亦甚認真屢獲首要盜犯此次魚泡子之眾若非該總兵迅速越境督剿斃其悍黨數百人賊勢未必就殄若非該練軍耐勞忍苦遠道窮追餘賊未必卽平宣化城工浩大頻年督軍修葺口不言勞而於采辦料物尤能格外核實計節省經費四五萬兩此該總兵實心任事之大略也臣仍飭其隨時益勵勤奮以固邊防所有查明被參各

款均無其事理合恭摺陳伏乞

皇太后

皇上聖鑒謹

奏

撥濟軍洋鎗片

光緒十年九月初四日

再臣欽奉八月二十八日

寄諭鮑超前次繳存天津洋鎗著李鴻章速即解交應用如存件業已撥付他營即著另行籌撥等因欽此遵查鮑超所部霆軍前次繳存前膛洋鎗多係銹舊損壞之件經臣飭局揀選可修者分別修整陸續撥發察哈爾山西等處及普慶各軍海防各營揀用其餘皆不堪修理不適於用未便解交現值防務喫緊各省紛紛請撥實有兼顧不遑之勢惟鮑超募營遠役待用孔殷不得不竭力籌濟茲飭局設法勻湊新修前膛洋鎗二千桿派委副將陶士傑妥慎督解剋日雇搭商輪運赴上海換搭長江輪船轉運漢口宜昌再換民船解赴夔州交收自津至滬船價飭天津支應局核發自滬至漢口自漢口至宜昌船價飭江海江漢各關道核發自

宜昌至夔州船價飭宜昌川鹽釐局核發並飛咨江蘇湖北各督撫臣轉飭遵辦妥爲照料以利通行暨咨鮑超查照外所有酌量撥濟巡軍洋鎗緣由理合附片覆陳伏乞

聖鑒謹

奏

京引展期復額摺

光緒十年九月初四日

奏爲京商銷滯累深原停引目仍難復額請再展限五年藉保課本恭摺仰祈

聖鑒事竊查長蘆京綱額引七萬二百餘道前因引多銷滯各商包課力實難支經前督臣何國藩奏請停引二萬道餘令勉力辦理俟行市暢旺相機議加旋准部議以五年爲限嗣於同治十三年光緒五年兩次限滿均經臣奏准推展五年扣至光緒十年底又屆限滿此五年中疊飭運司督商設法疏銷並嚴定月銷成數認真考核無如京綱額引過多自道光二十八年查辦案內每引又加鹽一百五十斤鹽包增重銷數益滯雖停引二萬道而現行之引尙有五萬二百餘道計光緒六年僅領銷引三萬二千八百六十七道七年僅領銷引三萬三百五十九道八年僅領銷引三

萬五百三十九道九年值領銷引三萬六百六十一道本年秋關將竣僅領銷引二萬八千九百五道均不及減騰五萬二百餘道之數實緣銷路有限勢難多領其滯引課幣仍須各商包賠且京外銀錢市價長落不齊其中又有折耗頻年地方災歉鹽價運腳亦較從前倍昂商累甚深若將停引二萬道責令復領則必多賠二萬引課幣力更難支恐紛紛參追轉於離綱有礙據京商恩裕泰等遞情稟由運司額勒精額詳請

奏展前來臣查目今時艱幣絀但可多增一引即多一分課款曷容稍涉推延惟引數必以銷數爲衡現引既尙未銷完實有不能再加之勢商情窘迫即使勉強抑勒徒多參懸仍無實濟相應仰懇

天恩准將京商原停引二萬道自光緒十一年起照案推展五年

以恤商艱而保課逕俟限滿察看銷數如能暢旺再行議加仍飭
運司實力督銷漸圖復額所有原停京引請展年限緣由理合繕
摺具

奏伏乞

皇太后

皇上聖鑒訓示謹

奏

旅順電綫酌提奉餉片

光緒十年九月初四日

再前因起辦山海關至營口旅順口沿海陸路電綫約需銀十萬兩左右奏請將平糶餘款銀七萬九千餘兩撥作工用已奉

諭旨允准其不敷之款經臣緘商奉天將軍府尹臣擬於長蘆積

欠奉餉內酌撥津貼准廢俗裕長糧和安設此路電綫直奉軍情

迅速可通本省諸應籌助工費請提欠餉地注等因查近來蘆岸

疊遭災歉銷滯商疲每屆徵起課銀不敷京奉本年要餉本難再

還欠餉惟現值戰事已成此項電工關係直奉軍報業經遵

旨起辦需款孔亟不得不勉爲其難設法籌湊飭據運司額勒精

額於運庫各款內竭力借墊銀二萬兩作爲奉省津貼電工要需

卽抵解同治五年長蘆節欠奉餉仍責令各員核實撙節辦理事

竣分晰開報不准絲毫浮糜所有山海關至營口旅順口電綫工

需緊急現由長蘆欠解奉餉內酌提湊濟緣由除分咨外理合附
片具陳伏乞

聖鑒敕部查照謹
奏

近省隄河工程摺

光緒十年九月初四日

奏爲光緒十年附近省城隄河歲搶修工段丈尺動支銀數循案開單奏報仰祈

聖鑒事竊照附近省城河道隄工或工段縣長或地居險要皆關民生利害須認真修防前經奏定每年於清河道庫河淤地租項下撥銀三千兩以爲各工采購料物搶修之用免其造冊報銷經工部覆准仍令工竣時開單奏報嗣因河淤地租不敷動支又經奏准在於清河道庫塋船稅夫生息項下按年動撥在案光緒十年開凍後卽飭照數撥給銀兩購備椿料實成前任清河道史克寬駐工督辦本屆伏秋汛內雨水過多大清及瀦龍趙王等河異常盛漲大溜淤拍岸激隄西淀水勢高漲狂風巨浪撞擊千里長隄雄縣趙村大壩迎溜頂衝隨廂隨蝕均甚危險經該道督率

印委分投設法搶辦數月之力一律保護平穩據史克寬會同
藩臬兩司將工段丈尺動用銀數遵照定章詳報前來除民夫土
方等項仍歸民辦外所有搶修樁料用款覆核無浮理合開具簡
明清單恭摺具

奏伏乞

皇太后

皇上聖鑒敕部知照謹

奏

謹將光緒十年附近省城隄河各工歲搶修工段丈尺動用銀數開具簡明清單恭呈

御覽

計開

一雄縣等處清河各隄險工開段共合工長四百五十丈搶修椿料共計用銀四百二十七兩五錢

一任邱等處千里隄並趙王河等隄險工開段共合工長九百五十丈搶修椿料共計用銀九百七十五兩一錢五分

一祁州安平博野蠡縣高陽等處瀦龍河隄險工開段共合工長一千三百五十丈搶修椿料共計用銀一千三百三十六兩五錢

一雄縣趙村大壩邊堤墊陷共合工長二十八丈搶修椿料共計

銀二百六十六兩

以上各工共用銀三千零五兩一錢五分除領銀三千兩全
數支用外計不敷銀五兩一錢五分已照數籌補理合陳明

籌辦團練摺
光緒十年九月二十一日

奏爲籌辦天津及畿東一帶團練恭摺陳仰祈

聖鑒事竊臣欽奉閏五月二十一日

寄諭御史趙爾巽奏海防緊要急宜兼籌團練一摺天津民情可用辦理團練可輔兵力之不足著李鴻章慎選該處公正紳士由地方官統率舉辦又奉七月十四日

寄諭太常寺卿徐樹銘奏畿東辦理團練著李鴻章畢道遠周家楣悉心會商妥議具奏又奉八月十七日

寄諭徐樹銘奏稱團練難緩請派京員前往督辦一摺舉行團練所以輔助官軍嚴緝奸宄必須經理得宜期於有利無弊著李鴻章畢道遠周家楣督飭地方官紳將畿東一帶團練妥爲辦理各等因欽此臣查民間雖可助兵力之不足惟自咸豐年間軍興以

來各省辦團鮮收實效或滋流弊誠如閏五月二十一日

聖諭如聚眾鬪抗官滋事或藉端逞忿任意燒毀洋樓教堂別
生枝節且值民窮財匱之時尤慮派捐擾累臣曾於去臘奏覆海
防事宜片內略陳在案今春有天津舉監等呈請團練飭據天津
府知府汪守正查復所呈各節並無把握亦非公正紳士其時兵
衅未開暫緩置議嗣因海防戒嚴飭天津司道等妥細籌辦旋據
邀集公正紳士商議擬就津郡水火會挑選精壯八千四百人鄉
甲局挑選精壯二千人其通商碼頭勇健之夫亦在其內公舉在
籍翰林院庶吉士高凌霨等經理卽由運司天津道津海關道督
同府縣與該紳等妥辦並以津紳記名提督鄧啟元河營守備郝
慶瀾派充管帶按期輪班操練由官添給軍械與舊存團防軍械
搭配應用查照舊章酌收城廂鋪戶房捐斷資經費月由該司道

等籌集商富捐資陸續抽練肅團一千人口給口糧常川操習俾成一隊略助聲勢至畿東一帶上與府尹臣咨商會商營飭該管道府州縣察酌舉辦順屬甯河縣之肅臺鎮先由府尹臣飭船捐局委員募勇二百名日給口分連鋪戶壯丁可合一千七百人實抵之林亭鎮並令商民集團此外順屬州縣亦擇要舉行其永平遵化各屬據覆邀商紳士辦理大致先由城關辦起按戶挑選精壯歸團每處數百人千餘人不等四鄉村鎮則各就情形或以數村十數村爲一團平時仍各安本業或先辦保甲以十家爲一牌戶出一人輪流支更有警鳴鑼爲號齊集各丁援應並聯絡鄰莊守望相助所需經費暫由官紳酌量捐湊概不派斂擾民並據永平府知府福謙詳稱該府稽查海口所過臨榆撫甯昌黎等村鎮及郡城關廂各團一律整齊等情前來臣復查民團向章不能請

發帑帑況值庫儲奇絀閭閻災祲之後困苦異常若專派團練大臣需費較巨無從籌措亦未必有實濟自應遵

旨由臣等督飭各該地方官紳妥爲辦理以專責成現在天津及畿東一帶已次第舉辦津郡商富較多集事稍易他屬應各照擬分別選丁歸團並行保甲聯莊之法勉以忠義務使平時嚴緝奸宄緩靖地面有警互相援應各保身家仍嚴明約束不得滋生流弊尤不准藉端逞忿別生枝節其沿海民船漁船並令逐處編查嚴杜接濟勾結其餘未盡事宜隨時督飭籌辦至徐樹銘原奏擬就順天捕盜營兵增募得力將士協同防守以爲民團之倡接府尹臣來函捕盜營兵共七百餘名擬先調二百名至京駐紮操練仍更番調練以期一律嫻習月需加餉於順屬錢糧奏明添撥如須籌款增募之處應由府尹臣自行察酌辦理所有籌辦天津及

繼東一帶開練緣由理合會同兼管順天府府尹臣畢道遠順天

府府尹

臣周家相合詞恭摺陳伏乞

皇太后

皇上聖鑒謹

奏

請豁積欠旗租摺

光緒十年九月二十一日

奏爲據案請豁積欠旗租恭摺仰祈

聖鑒事竊准部咨欽奉光緒十年八月初五日

上諭本年恭逢

皇太后五旬萬壽仰維

福佑普被寬區率土臣民同深歡忭允宜推廣

仁恩覃敷闔澤所有各省節年正耗民欠錢糧及因災緩徵帶徵

銀穀並借給籽種口糧牛具及酒項蘆課學租雜稅等項著將光

緒五年以前實欠在民者詳晰查明該省所屬某州某縣銀穀若

干速行開單具奏候朕降旨全行豁免等因欽此當經轉飭藩司

迅速詳晰查辦先行刊刻謄黃分頒各屬徧行曉諭毋任官吏胥

役影射侵漁在案茲據藩司崧駿詳稱直隸除民糧地外向有民

佃各項旗地完納官租與民糧事吳寶同光緒元年查辦豁免同治十年以前積欠民糧等項曾於是年六月初九日欽奉

諭旨李鴻章奏請豁免積欠旗租一摺各直省民欠錢糧業經於本年正月開恩詔內分別豁免惟直省民佃旗地完納官租與民糧事同一律近年災歉頻仍佃種旗地之民亦甚困苦著加恩將直隸各州縣同治十年以前實在民欠各項旗租並各案補徵銀兩一體豁免以紓民力等因欽遵在案今恭逢

皇太后五旬萬壽普天同慶光緒五年以前民欠錢糧等項已蒙明詔豁免其佃種旗地之戶亦無不仰望

恩施且近復連遭災歉佃民同一困苦請援案奏豁等情前來相應仰懇

天恩俯准將直隸各州縣光緒五年以前民欠各項旗地官租並

各案補徵銀兩除因災豁免外其實在民欠者一體全行豁免益足以廣

皇仁如蒙

俞允卽行司一併詳晰查明某州某縣銀數若干速行開單請奏仍先刊刻謄黃徧行曉諭其徵存在官者勒限提解司庫不准稍滋弊混理合會同兼管順天府府尹臣畢道遠順天府府尹臣周家楣恭摺具陳伏乞

皇太后

皇上聖鑒訓示施行再光緒五年以前旗租奏銷均已咨部合併陳明謹

奏

新募盛軍到津摺

光緒十年九月二十四日

奏爲周盛波因母老暫緩起程新募各營早抵津防已飭據周盛
傳委員代統訓練以備調遣恭摺仰祈

聖鑒事

竊臣欽奉九月初六日

寄諭前諭曾國荃傳知程文炳無庸赴閩卽率營改駐崇明現據
該督電稱崇明無須屯紮重兵程文炳一軍如已入閩境卽著迅
赴臺灣援剿周盛波新募各營改赴天津北塘一帶助防卽電知
曾國荃遵照辦理等因欽此當卽欽遵電告曾國荃以程文炳所
部已入江西距閩不遠自應仍令赴閩周盛波新募各營已經到
直應仍留津助防請其轉飭遵辦去後旋接湖南提督周盛傳文
稱代募新軍十營派委各管帶分投招選於八月杪先後抵營經
臣派員點驗均甚精壯配給後膛鎗礮認真操練惟據週缺題奏

提督前涼州鎮總兵周盛波函稱該提督之母年逾九旬左右侍奉無人悲痛強留不令遠行力保記名提督衛汝貴暫行代統等情臣查衛汝貴本係分統盛軍多年紀律嚴明識力強毅歷剿髮捻各逆營以偏師獨捍大敵堅不可犯近來講求泰西利器操法苦心焦思深得奧竅實准將中山色之員應准將新募各營暫交衛汝貴督率訓練期成勁旅仍俟飭催周盛波到津再行接統如周盛波未到以前無論天津北塘各路一有警信卽令周盛傳衛汝貴帶隊馳援氣誼素孚兵力較厚必可縱橫合擊埽蕩敵氛以仰副

聖主保固畿疆根本至意至程文炳一軍應遵

旨留閩由楊昌濬調遣相機援剿臺灣實屬兩有裨助所有新募盛軍到津暫行遴員代統緣由謹繕摺由驛具陳伏乞

皇太后

皇上聖鑒謹

奏

接濟臺防要餉片

光緒十年九月二十四日

再臣欽奉電

旨設法援應臺灣並接劉銘傳電稱餉缺尤甚臺地值法船圍困之際商賈絕跡進款毫無軍士露宿苦守斷難楊腹從事將帥無銀支發亦不足以馭眾較迎解兵械尤急直隸雖奇竊異常而臺防盼餉迫切但有可以匯運之處必應竭力勻籌臣督同在津司道多方艱掘據長蘆運司額勒精額面稱該司庫歷年商課內尙可湊撥銀十萬兩卽於九月十二日密商英國怡和洋商機昔迅速派船迎往臺北淡水等處劉銘傳行營交收或交臺灣道驗收轉解又飭盛宣懷電商廈門紳士候選道葉文瀾就近與臺灣商富匯兌據葉文瀾電復可派夥潛度攜帶匯票向臺北各商收繳劉銘傳營中濟用臣又飭迎司於歷年帑利項下借墊銀五萬兩

仍俟收起課銀照撥歸款續於九月十九日由匯豐銀行匯交葉文瀾照數驗收轉匯濟急除節次電請總理衙門代奏並分咨福建督撫及劉銘傳查照外所有暫由長蘆運庫湊提商課帑利等項接濟臺防要餉緣由理合附片陳明伏乞

聖鑒敕部查照謹

奏

尖底舢板勢難制勝摺

光緒十年九月二十四日

奏爲尖底舢板勢難攻敵制勝恭摺仰祈

聖鑒事竊准軍機大臣字寄本年八月十四日欽奉

慈禧端佑康頤昭豫莊誠皇太后懿旨神機營奏道員恩佑擬製

造尖底舢板輪船分布海面扼守海口如遇敵船遠近皆可攻擊

著查照所奏悉心籌議酌量試辦等因欽此當經督飭水師及機

器製造各員悉心籌議茲據統領水師總兵丁汝昌等稟復前來

臣查恩佑原擬尖底舢板船係以人力搖舵用槳與輪船所帶之

舢板式樣相同輪船舢板用十六槳行駛尙不甚快祇可空船渡

人不能裝載軍火行戰今以十二槳駕之卽有尾輪亦不能快必

爲敵船追及其尖底原期輕捷破浪今實以二十餘人及鎗礮雷

箭藤牌等件船載已重恐遇浪卽傾敵激沈海上風波險惡巨舟

尚不易涉。慙欲令舢板出沒洪濤，指揮如意。與鐵甲輪船爭雄，似非事理。所有至諾等飛小礮，管徑一寸二分，每出之藥不足三兩。遙擊無力，近則必先受敵擊。精利水雷，非搖槳之小船所能拖裝。洋火箭更非小舟所能取準。恩佑以夷船雖大，不能敵我之眾多。夷礮雖巨，不能擊我之散漫。謂可圍攻，制勝不知。外洋兵艦鐵甲厚至尺許，四面戰臺皆有鐵壁，艙係隔堵，舢係夾層，斷非舢板小礮火箭所能攻破。無論海面海口，彼但往來衝駛，輪動波翻，舢板已把持不定。且鐵艦皆有碰牆木，船觸之即裂。若被橫直壓碰，開放鐵壳羣子彈，小舟薄脆雖多，未有不沈燬者。蓋如驅羣羊攻猛虎，大小強弱之勢不敵也。方今海戰大抵以鐵甲禦鐵甲，則礮巨鐵厚，調度靈捷者勝。以鐵甲禦兵輪，則有鐵甲者勝。泰西諸國考究計算最精，最確數十年窮力經營於鐵甲，非好爲炫奇，因其有

實濟也小舟攢攻之說籌海者屢議而未敢行中國如有鐵甲船五六艘快船十餘艘魚雷艇二三十艘必可長驅而前與法艦決一勝負彼亦不敢正視若論以小勝大以多勝寡亦祇能用薄甲大礮快船及魚雷艇三五隻在海口圍攻一大艦追敵易及應變較速尙可出奇制勝若所擬舢板式樣在海而殊無把握似不必輕於一試徒糜經費理合恭摺據實覆陳伏乞

皇太后

皇上聖鑒謹

奏

派船援閩擬用洋將摺

光緒十年九月二十六日

奏爲遵

旨派船援閩擬令新募德國水師總兵統帶前往襄助恭摺密陳
仰祈

聖鑒事竊照欽奉電

旨飭撥北洋兵船赴閩援剿臺灣經臣將派撥超勇揚威兩快船
飭令豫備煤糧子藥卽由旅順口起碇南下入江與南洋所派五
船會齊密商相機前進電請總理衙門代

奏在案查北洋兵船除鎮東鎮西鎮南鎮北鎮中鎮邊蚊船六隻
專備守口威遠康濟兩艘專作弁兵水手練船並無大礮均不便
馳逐洋面接仗卽超勇揚威快船兩號每船雖有二十五噸巨
礮二尊而船身過小鐵板薄僅三四分易爲鐵艦大礮轟破穿沈

從前在英廠訂購此船原擬與鐵甲船相輔而行可以巡探接應
今德國定購鐵艦既爲公法所阻急切不能駛回僅此兩船力量
太單斷不足以禦大敵臣因旅順要口令該船駐泊其間與黃金
山礮臺水陸相依立腳既穩出入夾擊可期得勁茲臺灣危急奉
旨飭催派援明知法艦堅猛而多非中國現有兵船所能敵亦不
得不勉強派撥與南洋各船略助聲勢統領水師天津鎮總兵丁
汝昌前已奏明督帶蚊快各船扼守旅順與宋慶陸軍協力籌防
現撥快船赴閩而蚊練等船必須實令該鎮督率布置旅順爲津
沽門戶防務極關重要勢難分身遠去其管帶超勇之儘先副將
林泰曾管帶揚威之儘先游擊鄧世昌皆由船政學堂出身嗣又
出洋學習熟諳泰西兵船規法操練頗爲整齊第閱歷戰事尙少
未可以當一面適有出使大臣李鳳苞遵

旨雇募德國水師總兵式百齡改名萬里城到津謁晤英銳沈鴻
謀略甚優同治初年南北花旗之役曾爲美國帶師船打仗據李
鳳苞緘稱在德國水師中出色之員久經海上戰陣深堪倚任該
員願告奮勇帶兩快船前往並謂法船先後來臺灣洋面者不下
三十餘號中國師船單弱又經馬江大挫之後不宜輕試其鋒然
亦不可不設法牽制北洋快船二號加以南洋快船三號並另派
兩船如果管駕得人同心協力雖不能與法國大幫兵船鏖戰而
在閩粵之交相機乘閒避實擊虛或可攻奪其單行小號兵船及
運兵運煤糧之船察其所言洵屬知彼知己切中機宜臣詢之林
泰曾等均樂與其事藉得觀摩之益因令該總兵馳赴旅順統帶
兩船剋日開駛順過上海修理添煤約須耽擱旬日再會同南洋
派出各船相機密速前進惟接福州電報閩口馬祖澳近日法人

又添數船雖保不聞信截阻已屬式百齡與林泰曾等隨時確探
情形察酌進止臣等均宜不爲遙制庶免意外之虞除咨明兩江
督臣福州將軍閩浙督臣知照外所有派船援閩擬令德國水師
總兵統帶前往各緣由謹繕摺由驛密陳伏乞

皇太后

皇上聖鑒訓示謹

奏

輪船聯絡德國水師片

光緒十年九月二十六日

再外海輪船鐵艦駕駛測量行軍布陣法度爲西人專門名家之學其將弁皆自少至老專力殫精互相傳習更事旣多乃克有所成就緩急可恃中國創練未久勉效步趨將材非咄嗟能辦遽當勁敵縱橫洋面實慮船礮人才一無可恃轉資敵用而損國威南洋派水師營務處吳安康統帶五船聞其各管駕未盡熟悉海上風濤沙綫又未曾與北洋兵船會哨合操現今聯踪並進船隻甚單事機極險一切進止號令必須畫一整齊庶冀同舟共濟可否請

旨敕下兩江福建各督臣轉飭該統帶等與德國水師總兵式百齡妥爲聯絡商辦或有訓練未精見識未到之處可屬式百齡隨事幫同教練指示以增益所不能式百齡瀕行時與臣要約伊及

所帶德弁儼臨敵陣亡求加倍卹銀以慰其家屬儼奪獲敵船求加倍賞銀以酬勞將士臣皆慨然允之藉以作其忠義之心而用其致死之力是否有當附片具陳伏乞

聖鑒訓示謹奏

黃瑞蘭不堪任用片

光緒十年九月二十六日

再臣欽奉九月十九日

寄諭直隸候補道黃瑞蘭已諭令前赴天津著李鴻章將所撥輪船二隻卽令黃瑞蘭會同帶往福建速援臺灣又奉九月二十一日

寄諭黃瑞蘭前在直隸是否得力有無劣蹟著李鴻章據實具奏各等因欽此遵查直隸試用道黃瑞蘭與臣同鄉同治元年調充上海前敵文案因招降太倉州逆匪偵事被賊囚禁旋經官軍克復該城救出嗣於光緒五年由工部主事指捐道員到省疊經委辦營務處及旅順口工程並未專辦水師營務於兵船規制用法懵無所知該員貌似質直而舉動任性辦事糊塗文武將吏皆不願與之共事迹其語言狂妄似有心疾者臣不敢任徇庇同鄉之

皆是以撤去差使該員賦閑兩年時懷怨望復自行赴京鑽營保薦在言者或受其欺蒙而其人實不堪任用雖無實在劣迹可指若令會同統帶水師赴閩斷不可靠自應作爲罷論理合據實覆陳伏乞

聖鑒謹

奏